

遵義府志

卷四十七之四十八
雜記 舊志敘錄

第貳拾冊

遵義府志卷四十七

雜記

事有各門遺載者亦有不可錄入各門者茲並採摭成一卷以備方訓以佐稗官雖曰志餘不敢忽也樂子正寰字記載施州城東南有竹王祠卽夜郎侯祠也華陽國志云竹王興於遯水初有女浣於水濱有三節大竹流入女足間推之不去聞有嬰兒聲持歸破竹得男長養有武才自立爲夜郎王以竹爲姓按任昉述異記所載與此同水經注云女子斫竹節植地成林又云竹王以劍擊石出水一統志云宋崇

寧中詔賜竹王爲靈惠侯焉魯論孔子不語神怪茲
非神怪哉然墳羊鯢魚紀在往牒孔子非不知也特
不語耳余嘗刪元史至列傳巴而忒的斤有論焉論
曰余讀亦都護傳而歎太史氏傳疑也亦都護勛業
之隆三尚公主子孫世襲高昌王盛矣史稱其先世
產於樹瘦異哉此與夜郎之祖產於竹中何異况哀
牢觸沈木而懷姪高麗感日精而卵生皆有母道何
足訝乎

江漢叢談

王蜀有劉隱者善於篇章嘗說少年賫益部監軍使
書案於黔巫之南謂之南州州多山險路細不通乘

騎貴賤皆策杖而行其囊橐悉皆差夫背負夫役不
到處便遣縣令主簿自荷而行將至南州州牧差人
致書迂之至則一二人背籠而前將隱入籠內掉手
而行凡登山入谷皆絕高絕深者日至百皆用指爪
攀緣寸寸而進在於籠中必與負荷者相背而坐此
卽彼中車馬也泊至近州州牧亦坐籠而迂於郊其
郡在桑林之間茅屋數間而已牧守皆華人甚有心
義翌日牧曰須略謁諸大將乎遂差人引之衙院衙
各相去十餘里亦在林木之下一茅齋大校三五人
逢迎乃至於是烹一犢兒乃先取犢兒結腸中細糞

置在盤筵以筋夾調在醢中方餐犢肉彼人謂細糞為聖壘若無此一味者即不成局筵矣諸味將半然後下麻蟲裹蒸裹蒸乃取麻蕨蔓上蟲如今之刺豚者是也以荷葉裹而蒸之隱勉強餐之明日所遺甚

多通志

順治元年八月賊略彭縣邑趙姓妻官氏威遠人賊

屠縣氏先將數女縊死後自縊

蜀碧

丹稜學博何修云天啟間蜀大旱遵義守令集黃冠禱雨拜章者伏地彌日及起守詢之云上帝召天下都城隍議事章出甚遲問議何事云戰場始陝西至

崇禎初年秦中賊果起脩明季遵義人

蜀碧

李霖寰大司馬征播楊應龍敗逃固上李公以大砲

攻之楊裸諸婦向砲砲竟不然此受厭也

物理小識

陳啟相手爬崖記道無非險也而蜀稱最最尤在於

夜郎一境今自遵距蜀邑之仁懷八百里許峰高廻

日澗邃根雲割愁繫悶水石交橫一線蜿蜒曲折鈎

窟杳冥目不暇瞬足不暇躡當八百里之平地名手

爬崖耳之雖令人笑即亦不寒而栗矣道無非險也

而名以手爬異哉莊生之言曰足踐也足之所不踉

謂為善博者恃有餘于地茲獨不任足而任手豈難

定幾不欲有其目與膝之為累寄我愁心除是隨風
 直到一鳥身輕噫歎歎巨靈一掌開法手印後皆以
 五輪印印之誰敢不然將行旅人悉化宮人是曰魚
 貫化面壁是曰蝸觸化卦影是曰良背名之之義無
 乃然乎豈無一人能撒手者覺不爬不得也聞昔大
 將軍省吾劉公會一經理久乃頽壞過者苦之歲壬
 子余奉簡命協鎮遵土目觀太白蜀道難一篇已為
 是描畫矣有羽衣照空者銳志慕修始壬子歲之六
 月訖明年之九月乃竣道闊丈有二尺磴級凡百三
 十有奇行李安穩莫不欣快如禍難忽平如病悸忽

壯如陸地遊仙如禦寇十五日往來如鳧舄如雲間
 老萬回也乃知世間事藏至夷於至險之中伏至樂
 於至苦之後天地設險人功自神手持爬崖三字一
 旦拱手告別直誦之曰王道蕩蕩王道平平是不可
 不記按此文係代作中似有缺脫處見平水集
 夜郎採楠碑記天生楨幹之材以備隆棟之用而
 國家時簡勝任者取之然得之匪易奇偉之產遙遙生
 于環山疊嶂絕跡罕到之鄉如幽人碩士之藏用待
 時隱處槃澗也採取者恒憂憂乎難之我

世祖章皇帝統一海內創業垂統迨

皇上纘承丕基作述廿有餘年聞風向化識水來王者卽殊

方絕域咸稽首闕下而堂構尚仍卑陋非所以崇

宸居壯觀瞻也在部檄屢下而諸郡率以不材之木應余

思楚材晉用豈屬在版圖而可使清廟明堂之物委

諸草莽乎爰具疏自任卽蜀道難亦所不恤陟巉崖

履嶮巖研踵於豐草長林間舍輿而馬舍馬而步甫

兩閱月得大木百有餘株以之充梁棟而資巨任豈

復有遺材耶使當事之遴才者果如余之周爰諮諏

實心採訪或亦不至有淪落之嘆也疲藪之暇特援

筆而誌之一片石見舊四川志藝文未載撰人名據云作述廿有餘年則齊穉杭愛踏

勤之役也

藜草卽燂麻黔蜀有之生於籬落溪厓間葉類麻多

毛刺螫人手足腫痛至不可忍杜子美所謂草有害

於人曾何生阻修其毒甚蜂蠆其多彌道周是也不

知者往往爲其所中比其毒於蜂蠆蝎蝮殆不爲過

鉏而去之置諸水中勿使滋蔓所以遠惡也然土人

采之沃以沸湯則可已瘋亦可肥豕世固無棄物哉

以章子厚而治軍以韓侂胄而傳旨非盡無濟顧用

之者何如耳宋祁益部方物志於燂草亦云葉能螫

人有花無實冒冬弗悴可以祛疾古人謂是草堪醫

信哉

羊桃藤吾嘗讀陸元恪之書而未之識也一日將治南堤患其石之不固匠氏持纍蔓至白余曰用此之汁以合石粉膠漆不啻也問其名則爲羊桃藤因憶陸云萇楚今之羊桃引蔓似藤今人以爲汲灌爾雅云萇楚鈹芑羊桃也鄭箋云萇楚藤生子赤一名鼠矢又云鈹芑之性始生正直及其長大則其枝猗儺而柔順不妄尋蔓似又與陸說左矣陸佃云萇楚今羊桃白華子如小麥葉與實皆似桃故有桃之號也一曰有兩羊桃一種華實皆連理故詩以刺淫焉此

但言其子實根蔓耳而未及其纍之用也陸氏亦但謂其可爲汲灌而未及於固石也夫石堅確而崎零乃以柔蔓之液遂能締合而成交宜詩人之見刺也獨念牛羊之用多矣旣以名棗又以名桃而果赫之細又曰奶櫻桃之別爲牛桃芑之名牛蘄蒼之名牛藻蔞之名牛棘瀆之名牛薺義雖無取而其稱則恠矣故箋之

雞縱負苞之族肉芝之遠裔也一名螳奪所生之下多白螳氣所蒸也秋七月生淺草中初奮地則如笠漸如蓋移晷則紛披如雞羽故曰雞以其從土出故

通志卷四十七
曰堽種有二惟紫者可茹白能傷人蓋竊其似以亂
真不可以不察也又有肥瘠之殊肥者味厚瘠者薄
理固然也蹲而采之來歲可再得立則否然亦視其
雨暘之愆若爲羨耗以之充庖甘鮮殊可悅熾而藏
之膏而漬之滇以永昌蒙自爲最黔則普定所產味
不及滇埤雅引莊子雞菌不知晦朔集韻埤土菌也
鳥飛而斂足菌形如之

刺梨莖生夏葩秋實幹如蒺藜多芒刺葩如茶蘼實
如安石榴而較小味甘而微酸食之可以已悶亦可
消滯漬其汁煎之以蜜可作膏正不減於梨楂也然

亦有貴賤瓣之單者土人以之插籬而代槿胎之重
者名爲送春歸春深吐艷大如菊密萼瓣英紅紫相
間而成色實尤美黔之四封悉產移之他境則不生
豈亦畫疆之雉過淮之橘耶又普定烏撒黎不下建
陽宣城亦有黎膏佳者不下河間

武侯錦用木綿線染成五色織之質麤有文采俗傳
武侯征銅仁蠻不下時蠻兒女患痘多有殤者求之
武侯侯教織此錦爲臥具立活故至今名之曰武侯
錦

斷腸草叢生根如商陸葉類蓼而大莖有節當心抽

花蘂數十作穗花淡紅色久漸赤子離離似桑甚黔地多有之署園中百叢也紅鬢內艷頰牙外標華橙之映翠幕丹瑤之厠碧瑤當不過是初至未識其名有焚兒自尋甸至始呼之毒能斷腸可賊也辛未夏雨過忽來小鳥止於穗間羅之綠衣鳥距似倒挂么鳳軒輕才五銖極可玩籠之三日焚兒曰此斷腸鳥也嗜啄斷腸花子采而飼之可久活試之果然蘆笙釋名曰笙生也象物貫地而生以匏爲之其中空以受簧是爲匏笙女媧氏之笙也記曰絃匏笙簧黃帝命伶倫截嶰谷之竹雌雄十二以象鳳凰之鳴

形似鳳翼故又曰鵝笙爾雅曰大笙謂之巢小笙謂之和又云笙之大者曰竽則又可稱竽笙矣鹿鳴之什曰吹笙鼓簧笙必有簧猶喉之有舌也語云調鳳管炙鵝笙簧必炙而後鳴物必暖而後生也古之善吹笙者王子晉緱山之事杳矣不意得之蠻荒每歲孟春苗之男女相率跳月男吹笙於前以爲導女振鈴以應之連袂把臂宛轉盤旋各有行列其笙截竹爲管者六通其節而櫛比之長者四尺以次而殺短至三尺參差若羽竅其短者孔六以達於長以指捫之若撚笛然而又截竹徑尺銜縮於六管之銜而吹

之呼吸聲若鴛鴦之瞭漢每至看場既圓歡情
 欲治則遲其聲以媚之長管之上冒以匏短管之中
 置以簧簧用嚮銅為之恆用火炙亦古制也前人詩
 云管清羅袖拂響合朱唇吹人情應節轉逸態逐聲
 移苗俗固不嫻音律而其應節之轉逐聲之移則又
 善於形容也以上

明議定四公祭禮詳文欽差整飭遵義兵巡道四川
 按察司副使孫為祀典事據遵義府呈據遵義縣申
 奉本府信牌蒙道紙牌照得功臣將軍劉縱昔年以
 平播開疆此方士民為之建祠肖像以伸尸祝之意

蓋有日矣今者廟貌日新俎豆尚缺非所以崇德報
 功也况劉帥近以援遼暴骨沙漠天下共嘉其忠勇
 由前則有展疆拓土之勞由後則有捐軀血戰之績
 撫茲故里或亦忠魂所棲而曾不獲一血食之報於
 祀法以死勤事之義何居焉今查議等因行府仰縣
 即於堪動銀兩內酌議祭需牲帛等項每歲春秋吉
 期陳設本帥生祠該縣親詣致祭有無安便逐一議
 確明白具由詳府以憑呈詳本道轉呈兩院著為定
 例施行奉此又奉本府信牌為祀典事蒙本道紙牌
 照得崇德報功自是盛典遵義開創在事功臣除割

公家廟原設有家丁看守近行該府議設祭祀外所有總督部院王李布政使崔三公祠在桃源洞東林寺向無祀典已經通行查議去後及查本寺住持僧人宋應宗等二十一眾看守本祠香火原無常住看得三公祠宇非責成住持典守日久必致傾圮然各僧無恆產則去住不常非所爲永久之計合行查議妥確具由申府以憑覆議轉呈本道施行奉此該縣署印本府推官熊廷相看得長垣李公新城王公獲鹿崔公江西劉公皆以文武壯猷或以開先或以善後其功烈垂於新疆不朽播之士民祠文臣李王崔

三公於桃源洞東林寺右其武臣劉公別構一祠於時廟貌新宏四公明神有棲而後之人亦旣快瞻依矣惟是草昧之區芬苾未舉崇德報功之典謂何今蒙本道議設祭禮誠爲亟務相因於裁省把總陳領給內動支銀五兩五錢二分買備祭需牲帛每歲春秋二仲陳設兩祠縣官如禮行事庶於明德馨香有報而於國朝祭法合矣本府知府杜天培覆查開欸冊報前來本道未敢擅專擬合通詳爲此具前由同祭需價值文冊呈乞照詳施行萬曆四十八年三月內呈詳撫院饒批每歲於裁省把總口糧內照數支

備辦致祭其三公焚獻僧常住田土聽該縣查給另報此繳按院吳批四老先生之英烈宜崇祀以昭典禮裁省口糧如呈動支著爲令繳隨筆一件軍務事石砭宣撫司申稱奉調士兵三千赴重慶城西劄營竊念本司兵力不當一面之寄再請調二三千隨分一路前驅搗巢由詳批據申不但忠勇過人亦且機宜諳練土司中得一馬千乘足可當勝兵數萬本部院深所嘉賞仰將該司健兵再整三千聽候調發此繳一件繳賞辭糧等事石砭宣撫司申本司護印正妻秦氏將兵道賞銀二千兩繳道弁請

前後士兵五千三員名支給糧餉外外報効兵二百六名不煩概給由詳批土司兵多有虛名冒餉者秦氏以一婦人能捐資給兵辭賞報効此其賢加人數等矣仰巡上東道先動銀六兩打造銀牌一面上書女中丈夫四字給之以示旌異待有功之日將其夫妻並薦於朝另有異恩繳平播全書

楊應龍小妻田雌鳳乃白泥司人其壻田駟卽雌鳳之族駟母單氏旣寡石砭宣撫馬徽娶爲妾單嫁兩月卽生駟後雌鳳欲以駟改名千駟占徽子千乘石砭地方不遂其志駟旋被僞軍師孫時泰誤射死千

乘卽秦良玉夫也征播之役良玉夫妻功極多萬曆二十八年正月初二日賊乘官軍宴飲夜襲之良玉以所佩劍屢鳴速報大營于乘自宴席馳歸同良玉邀賊鄧坎禽應龍征東將軍吳尚華乘勝盡破九股生苗奪金鏡七寨逼桑木關取之應列戰功第一彼時若無良玉大軍被襲失利大矣李于田平播疏中毫不敘及二人何歟

節錄明戶科給事中某奏事云楊應龍負固不服執政貪其重賄與之交通如近日綦江捕獲奸人得所投本兵及提督巡捕私書其餘四緘及黃金五百白金千虎豹皮數十不言所投臣細詢播人始囁嚅言曰求票擬耳夫票擬輔臣事也而使小醜得以利動哉

遵義協署右有蓮池四面石欄有乾隆八年副將周重修等字池中一亭懸碧水晴空扁欵癸卯林鍾月北平劉明智題今亭已毀明智以何時任無考矣魏相字公輔甘肅鞏昌府靖遠縣人祠在祝釐寺側塑像奉之其碑文係康熙五十二年癸巳九月唐廉撰漫漶不可識門上式昭顯德扁欵康熙己丑乃相重修大士閣全屬官兵獻大士者後以懸之相祠殊

誤

塞達平播碑記序事較他書特詳中間監督紀功諸人亦有他書鮮見者謝詔江西人王應麟龍溪人程正誼永東人史旌賢江寧人沈繼文吳江人傅良諫臨川人並進士

楊端太子少師令狐滈中軍左護衛將軍成展中軍右護衛將軍羅瑩後軍鎮武總戎楊威前軍副元戎安增將軍並同時入播正安草志七大姓楊端太原陽曲籍羅瑩撫州宜黃籍令狐滈太原籍成展交城籍楊威安增皆廣平清河籍一則鄭姓原籍鳳陽府

岐山縣乃鄭畋之後先入播州志言畋長子開成蔭邊鎮職四子開龍官淮南節度使後亡於後唐以下傳寫脫誤似是開龍娶朱溫女生子鄭昌生者考昌孫於府志省志言禦元兵保境有功是宋末人如五代時別有鄭昌生則草志不應於昌生名下序及禦元兵事大抵平播者或即開龍或開龍之子而昌孫不知爲開龍幾代孫矣

萬曆二十八年正月初二夜石砧馬千乘秦良玉奪取楊應龍七寨曰金筑寨青洲嘴寨虎跳關寨明月關寨赤崖關寨清水坪封寧關皆在桑木婁山諸關

外爲生苗所守一少中盡取之

馬千乘殺僞軍師孫時泰秦良玉禽田駟妻楊二公主在賊破綦江之後正月初二夜千乘又擒吳尙華其勸應龍囚宴劫營尙華計也幸良玉警覺未墮其狡耳

杜猗蘭在西安遇鮑道人者一見卽語云君何爲來此宜速去明年奏對辭須爽剴時雍正元年次年會試下第後

特旨揀選五省効力人員猗蘭引

見以雲南知縣補用始信道人果前知猗蘭蓋以前署守胡

期恆時任陝藩招往西安也

乾隆初年郡城諸生李相廷等請乩於插旗山王靈官降筆書云一聲霹靂山河震城隍使者亦心驚直胆忠心扶上帝功在山河德在民有武生姚文明者傾險人也聞之潛往偷窺乩忽書惡人至矣眾問誰書姚某何不前眾乃知強姚前跪姚不肯挪揄曰汝輩又假弄邪神乩復書指姚隱事云且受我一鞭姚卽覺右肩擊一下馳歸大痛歷十二年不愈以死駱元賓之祖玉圖自序其家世云駱賓王之第三世孫共三人長世華次世芳次世榮世華於唐僖宗二

年受封珍州長官司從浙江義烏縣遷珍州居世芳
遷蜀西隆昌縣世榮遷蜀東長壽縣世榮第二十三
世孫名武明末由長壽籍中武進士歷任貴州敷勇
衛指揮為皮熊所害妻戴氏亦以罵賊死時武之子
奇雲在襁褓有義僕竊逃入遵義避難長娶周氏其
孫即王圖則世華唐人也宋之大觀中獻地者必是
其後幾代孫通志以世華為宋人且列之鄉賢未詳
考之誤

按大觀二年駱世華與駱文貴獻地明載於宋史
徽宗本紀龐恭孫傳及李攸宋朝事實此等大事

在當時必有獻土章奏事案並非鑿空撰此人名
豈有正史實錄不足據而反信無徵家譜者又唐
元和二年已廢珍州長官司非唐宋官制謂世華
於僖宗時受封珍州長官司亦非事實或駱丞避
禍時子孫逃之荒裔其家相傳夫其世系後遂以
著在史冊之世華傳會之耳而不知與史文舛也
因事涉名流略考正之

遵義九呂灘乃石砭女土官秦良玉率其族將秦衍
祚敗奢賊處

府城北門外溪上路側有石刻在城臥龍坊高傑之

妻司氏拾銀十兩五錢用修石路數丈云云係萬曆十九年辛卯十二月立

貴州黑神廟通祀南霽雲按四川簡州黑神廟祀宋州牧李大全廣西省城黑神廟祀平章也兒吉尼是有三黑神矣遵義通祀土主不定爲何人

按遵義祀土主與川主藥王稱三聖鄉城以爲重祀不知土主何人或曰任貴也愚考祀土主特四川之俗遵義本蜀地故同而土主亦隨地異祀巫山縣祀知縣李鎮修雅安縣祀漢邛穀王任貴天全州祀李真人濠陽縣祀韋臬銅梁縣祀趙延通

江縣祀洋州刺史李繼賢儀隴縣祀晉張英彭縣鐵峰祀姚萇其廟皆名土主廟謂遵義祀者任貴前籍無明文恐談者僅知雅安之祀而實之也

錄登室

英佑侯廟府志謂祀蕭日軒通志於思南府壇廟下亦云按明景泰四年九月封蕭天任爲靈通廣濟顯應英佑侯天任乃伯軒之孫茲以天任封號移加伯軒且誤伯軒爲日軒何也

郡城外大悲閣肇建於唐之乾符二年中有昭武元年戊午孟冬所鑄鐘昭武吳逆僞周年號戊午乃康

熙十七年也

相傳桃源洞爲三丰寄跡之所又傳張仙來去隱現
言人禍福救人災厄曾於城中遇一少婦突以手搏
其頸口齧之旁人怒欲捶張張釋手曰可惜繩猶一
股未齧斷未幾婦縊死果以雙繩作績紐其一股掙
斷以一股畢命人始知爲真仙然談者不實指爲三
丰予閱洞口一刻云或賣癡來或賣顛無人識我是
真仙若要問家何處止在桃源洞口邊歎本仙張
三丰題與父老相傳僅異數字則三丰之寄跡桃源
確矣

桃源洞口有江東童仲悛二詩一碑童嶧縣武進士
萬曆時都指揮使天啟元年與陳策秦邦屏並死瀋
陽之難洞內刻詩有陽山周志偉者安義人由進士
任嘉靖時四川按察司副使

明史順治乙酉同史可法死難揚州者有遵義知府
何剛字慤人上海人崇禎三年舉人未赴任而投井
死

劉超天啟間以征安邦彥功授總兵按超跋而狡坐
罪免官上疏言兵計陳新甲用爲河南總兵以私怨
殺其鄉官御史魏景琦一家三十餘人據城反巡撫

王漢討之聲音招撫計洩爲所殺旣而超伏誅傳首九邊據明史超爲四川遵義總兵其叛而降也緣與馬士英相識

康熙中正安知州汪曾垣曾於遵義審妖案蓋何姓田積石俱滿控不能決曾垣祈於城隍約助冥役四人旋冥役械妖至曾垣坐公堂惟喝令速速改過以筆書空作判結冥役旋開鎖釋去時縣役中惟一人見之是夜何氏田中之石盡不知所在亦一奇也

通志萬曆十九年楊應龍屠妻張氏按應龍疑妻張氏奸淫出之已而飲田氏兄所乘醉封刀取張并其母首屠其家乃萬曆十五年事

貴州通志崇禎己卯科有遵義舉人謝繼宗四川舊通志有謝傳芳名在繼宗上俱云遵義人未知同科否

郡城大士閣又名萬壽寺康熙甲午署知府胡期恆設義學其中延杜公思賢主講以上心齋隨筆

李鳳翽土主考土主任公名貴不知何許人西漢末越雋太守也按黎州志州有靈應祠祀任貴宋薛紱記曰任侯殺王莽郡守枚根自領太守光武使任彭平蜀遣使迎降有忌功者讒害之貴以冤死史臣不

爲力辨使其附漢之志不明爲可哀也雅州志曰順靈應廟者俗名土主廟祀漢邛穀王任貴貴仗義秉節有惠于民邛人德之歲祀不乏明一統志東漢建武時封貴爲國王公廟四川各府州縣有之遵義舊隸于蜀故祀其神云

黎安理記遵城水嘉慶辛酉春長子恂遊庠余送之郡謁先師釋菜是日天朗氣清夜闌寢矣至丙夜雷電大作猛雨翻盆屋瓦磔磔格格幾欲塌而不能支驚起則被褥盡濡電光所燭見室中水已深尺餘而雷雨更甚如天崩地裂澎湃奔騰水不及簞僅寸許滿城喧呼號哭闔溢街巷余黑夜立水中直不知猶在人世延及曙街水尚數尺乃知水由水井灣半坡暴漲而下衝決當路房宅淹捕署近一丈逕天后宮倒磚壁橫流大十字合西門溝之水盪大街倒築王宮甃壁殿前石缸二衝至熊氏門直流下撈沙巷有汪姓二宅及中男婦七口並地基衝低三尺盡沒烏有折出東右水門入湘江計街房衝去者數十家丁口淹沒者百餘人人皆疑爲有神物遊焉而實無有也當時滂沱大作如排山倒海而至卽長江大河巨浪洶沸不能狀之其山潦直瀉千仞急流奔注旣無

溝渠以納之又無隄防以捍之一任其猖獗汎濫於
城市而無如何蓋勢然也其人民之死於水房舍之
漂沒於水者亦其數焉時撈沙巷口柳樹間流一人
援樹呼救一流至右水門其項爲柵柱所夾一衝
落天后宮側陰溝口中水倒碑蓋其口冒而過俱得
不死非數不在水劫與時嘉慶辛酉三月廿六日
又記鄒氏子嘉慶丁卯秋至郡城競傳鄒氏子事其
子在孩提時卽伶牙俐齒家人無大小皆悅之惟絕
不呼其父亦絕不向其父一言三四歲時卽時與家
人言我家有一人負我銀應償我其家人問爲誰卽

又含餽以應自後時時言皆以爲謾語置之至八九
歲時此子隨至親友處亦每言之今年九月從其祖
母至姨祖母家卽又言之不已其祖母再三問之乃
曰負我銀者我父也問負多少曰四千金此子歸卽
病病中促家人曰速償我我將去旣而曰我至此八
九年家人遇我厚可讓二千餘急償我乃市楮鏤盛
以箱於臥榻前親向其子數而付之其子觀貯畢辭
家人曰我將去急取酒食食我食訖卽逝余聞之訪
於其親果不妄

乾隆己亥秋自通平里痴水館歸省次日還過禹門

寺俯首次且行緣崖數十武上石梯突當道一大蛇約長二丈頭戴紫冠生黑毛身圍如酒甌尾距足僅寸許余覩猙獰狀駭而返奔是日大晴行至桶井垵仰見彩虹五色直落半空俗謂之龍挂見主里中科名是年余果膺鄉薦

石頭山舊塔乃丈雪老人所建額曰蕉鹿園記幼時與二三牧兒之塔中有瓷甕一大如酒罈常貯水半甕不盈不涸後一丐竊持至山下為眾鬼拉擊棄甕而去次日甕仍在塔中並無人持入亦異矣並夢餘筆談陳懷仁青桐樹考遵郡本蜀地多產桐樹名曰青桐

俗呼家青桐

宋書載開寶五年資州獻梅青桐二木合成

連理桐名繫青要以色耳而稽古家皆不言其枝葉形狀何若第篇海註云高木故人每以榭檄椽櫟雜當之而不知判然三木惟以為榭檄者是也其見於詩曰樸檄爾雅曰檄樸心郭璞註曰榭檄別名榭檄生高數尺之時歲當蠶月出山蠶蛾子蠕蠕然散置樹上聽其眠食食盡人復為枝枝相換葉葉相移至三眠後作繭滿樹垂垂遵地舊多其樹原無山蠶先蓋有於山東之安邱石門諸處見司農孫公廷銓山蠶說及王漁洋清溪榭葉始濛濛樹底春蠶葉葉遍

之山蠶詞乾隆初年郡守厯城陳公王鑿始自其鄉
攜種來遵親教民以飼養之法其飼也懼鳥啄而銜
咸作棚廠於野伺逐之必設位祀陳公於廠不忘本
也若夫椽亦一木而數名俗呼水青樹又一種山海
經景山之杼爾雅之桷杼詩之苞桷柞枝漢之五柞
說文集韻之椽皆椽也榭與椽俱有斗斗包其實之
半榭仁止痢功同椽栗但椽葉不似榭葉之可飼蠶
染阜家之所用榭斗不及椽斗之佳作炭則榭勝於
椽作器則椽勝於榭各有其宜耳至於櫟有棗全包
其子俗呼榭與榭椽之斗不同因榭葉之形稍同櫟

而木性之堅韌同冬青冬青名榿故有稱榭為青榿

者後呼榿為榭於榭子亦稱櫟榿子均比擬之詞非

以榭即榿更非以榭即櫟也而椽之於櫟尤相混淆

詩之苞櫟本別於苞桷也郭註爾雅於桷杼下云桷

樹不兼言櫟也於櫟其實棗下云有棗彙自裹不兼

言桷也惟陸璣詩疏緣秦人謂桷櫟為櫟徐州人謂

櫟為杼或為桷遂據難據之方言指苞櫟為桷櫟又

指苞桷為桷櫟以房棗釋苞櫟句之桷櫟又以阜斗

釋苞桷句之桷櫟此無論於秦人以外不可加桷於

櫟亦於徐人以外不可以杼為櫟也即以形似不妨

概稱豈有同一柞欒忽房椽而忽阜斗者乎房椽之
爲欒阜斗之爲柞欒子味甘柞子味澀柞不與欒混
欒自不與柞淆也乃博雅如羅徽五之講經李雨村
之平谷詩亦復訛以傳訛信救荒本草合椽欒柞欒
椽栗青桐而一之不察椽欒榭椽之俗呼家青桐者
爲一木椽樣柞杼柞之俗呼水青桐者爲一木而欒
之俗呼桴欒子者又爲一木正字通旣斥陸璣及本
草合椽欒之爲非顧不自知合柞欒亦悞則甚矣稽
古之難也

心齋集

尹彛憲號古愚修文舉人官廣西百色同知家遵義

天池之側有文行於天池上建文昌閣撰序云天佑
下民作君作師自吾夫子集羣聖大成立師道之極
則嗚呼至矣弗可及矣世教浸衰詩書執禮難喻顛
蒙嗣文昌帝君乃闡洪範陰陽之說旨不外乎迪吉
逆凶而其言盡人可曉於是愚夫愚婦亦易興起其
好善惡惡之心是非吾夫子之大功臣耶夫百工曲
藝何關大道而觴酒豆肉尙不忘本文昌之德生民
若此祠宇之盛遍海內而吾里闕焉甚非所以寓警
惕也嗚呼梵侶緇流上何益於國家下何裨於人民
而挾其福田利益之說以簧鼓斯世一時之顯布施

者肩相摩趾相屬也吾黨於文昌乃僅醵金祀之民
舍其顛倒不已甚乎石橋之東有地數畝甲寅秋與
諸父老謀建祠効力捐資各分其任不數月而成是
亦足驗吾鄉風俗之厚也然語曰敬其人不如服其
教自是歲時拜謁於斯願以陰騭之說父戒兄勉使
男盡端慤而知禮女盡勤淑而聽從斯明德以薦馨
香神之佑之必又出尋常之外也

正安廩生鄭仕儒以孝聞麻哈蔣親魯撰墓誌云余
始來司鐸遇於州南之大坎見動謹詞樸心知爲有
道之士後考其行誼悉君四歲失恃事繼母楊及郭
曲盡孝思楊有疾君年弱冠侍湯藥者衣不解帶數
旬疾甚君刲股和藥以進嗟夫人苟以孝自期大抵
左右就養規仿前人能適口體矣未必能悅心志也
表裏未純至性不篤僅幸告無罪耳夫古之稱孝者

哭竹臥冰之類豈有所仿哉特其至愛性成當父母無事則先意承志以悅之一值危急存亡之時雖平日如臨如履之身而置諸淵納諸水苟可以生吾親皆不暇顧恤矣君所爲何以異是雖其事屬傷生且干明禁豈不知而蹈之耶蓋其真性所發不容自己也至其文章亦極純正數因棘闈終不獲售命也嗣子女壘勤學有聲正安

潘紱字來朱大足人崇禎丙子舉人仕詹事府主簿年五十卒於邊義寓貴州時有欲強之仕者紱笑而不答作老女吟以見志著有天布齋稿鐸音益中鳴

集四川志

向廷賡字修野號香海康熙丙子舉人性聰慧博極羣書弱冠舉於鄉兩試春闈不第遂絕意進取以教授生徒爲業尤敦實行循循盡道人無間言工吟詠兼善醫常布襪青鞋賣藥市中後官巴縣邛州潼州等處教授大學士鄂爾泰總制滇黔知廷賡賢列入薦牘除湖南巴陵縣知縣未幾以老病歸雍正十一年

詔舉博學鴻詞當道以廷賡名上辭不赴迨遙林下自築生壙并爲文以誌其墓年六十餘卒著有香海詩文集

倫風史詠易圖貫述等書行世

上同

按廷廣雍正四年任桐梓縣教諭印志載之今猶有道當日從之遊者則於遵義當有教澤可傳惜其事跡無徵四川志且不及教桐一節故錄此見其生平云

蜀漢庾降都督列傳漢武開西南夷爲郡縣設益州牧以統之至後漢建安十九年劉先主定蜀以南中諸郡土地廣遠州牧在蜀不易控制乃分立庾降都督庾降卽朱提郡本犍爲南部建武後省爲犍爲蜀國裴松之曰庾降訊之蜀人云去蜀二千餘里時未

有寧州號南中立此職以統攝之遂以鄧方爲都督方字孔山南郡人也以荊州從事隨先主入蜀蜀旣定爲犍爲蜀國都尉因易郡名爲朱提太守選爲安遠將軍遂爲都督住南昌縣南昌晉猶有鄧安遠城陳壽以失其行事不爲立傳楊戲輔臣贊贊鄧孔山曰安遠強志允休允烈輕財果壯當難不惑以少禦多殊方保業華陽國志曰鄧方治南昌夷漢敬其威信其爲人亦可概見矣章武元年卒

楊戲傳注作二年此據華

志李恢代之恢字德昂建寧僉元人先任郡督郵太守董和復貢恢於州未至聞先主攻劉璋知必成乃

託名郡使北詣先主遇於綿竹先主嘉之成都既定
先主領益州牧以爲功曹佐書主簿更遷別駕從事
鄧方卒先主問恢誰可代者恢對曰人之才能各有
短長故孔子曰其使人也器之且夫明主在上則臣
下盡情是以先零之役趙充國有言莫若老臣臣竊
不自揆惟陛下察之先主笑曰孤之本意亦已在卿
矣遂以恢爲庾降都督使持節領交州刺史往平夷
縣先主薨高定恣睢於越雋雍闓跋扈於建寧朱褒
反叛於牂柯丞相亮南征先由越雋而恢案道向建
寧諸縣大相糾合圍恢軍於昆明時恢眾少敵倍又
未得亮聲息給謂南人曰官軍糧盡欲規退還吾中
間久斥鄉里乃今得施不能復北欲還與汝等同計
謀故以誠相告南人信之故圍守怠緩於是恢出擊
大破之追奔逐北南至槃江東接牂柯與亮聲勢相
連南土平定恢軍功居多封漢興亭侯加安漢將軍
後軍還南夷復叛殺害守將恢身往撲討鉏盡惡類
徙其豪帥於成都賦出叟濮耕牛戰馬金銀犀革充
繼軍資於時費用不乏建興七年以交州屬吳解恢
刺史更領建寧太守以還居本郡徙居漢中九年卒
以襄陽爲郡督翼字伯恭繼爲武陽人先生

牧翼爲書佐建安末舉孝廉累遷至廣漢蜀郡太守
建興九年爲庾降都督綏南中郎將翼特嚴法不得
殊俗之歡心者率劉胄背叛作亂翼舉兵討胄未破
徵翼以馬忠爲代羣下咸以爲宜便馳騎卽罪翼曰
不然吾以蠻夷蠢動不稱職故還耳然代人未至吾
方臨戰場當運糧積穀爲滅賊之資豈可以黜退之
故而廢公家之務乎於是統攝不懈代到乃發馬忠
因其成基以破矜胄丞相亮聞而善之後追論討胄
功賜爵關內侯馬忠字德信巴西閬中人也少養外
家姓狐名篤後乃復姓改名忠建興三年丞相亮入
南拜牂柯太守值朱褒亂後撫卹甚有威惠八年召
爲丞相參軍副長史九年督將軍張嶷等討汶山郡
叛羌十一年南夷豪劉胄反擾亂諸郡以忠代張翼
庾降都督斬胄平南土加忠監軍奮威將軍封博陽
亭侯初建寧郡殺太守正昂縛太守張裔于吳故都
督常駐平夷縣至忠乃移治味縣處民夷之間又越
巂郡亦久失土地忠率將太守張嶷開復舊郡由此
就加安南將軍進封彭鄉亭侯延熙五年還朝因至
漢中見大司馬蔣琬宣傳詔旨加拜鎮南大將軍七
年春大將軍費禕北禦魏敵畱忠成都平尙書事禕

還忠乃南歸十二年卒忠為人寬濟有度量但詼嘲大笑忿怒不形於色然處事能斷恩威並立是以蠻夷畏而愛之及卒莫不自致喪庭流涕盡哀爲之立廟祀水旱必禱焉張表時名士清望踰忠闔宇宿有功幹於事精勤繼踵在忠後其威風稱績皆不及忠表字伯達蜀郡成都人有威儀風觀仕至尙書代馬忠加安南將軍楊戲華陽國志作副之戲字文然健義今依蜀志爲武陽人少與表並知名以東曹掾遷南中郎參軍副貳庾降都督領建寧太守以疾徵還所在清約不煩蜀志有傳闔宇字文平南郡人表卒後代爲都督

楊戲傳曰張表始名位與戲齊後至尙書督庾降後將軍先戲沒霍弋副貳之弋字

紹先南郡枝江人梓潼太守峻子也累遷太子中庶

子援引古儀盡言規諫甚得切磋之體爲參軍庾降

屯副貳都督華陽國志弋甚善參毗之禮遂代字爲

教輕重允當又轉護軍統事如前時永昌郡夷獠恃

險不賓數爲寇害乃以弋領永昌太守率偏軍討之

遂斬其豪帥破壞邑落郡界寧靜遷監軍翊軍將軍

領建寧太守還統南郡事景耀六年進號安南將軍

聞魏軍來弋欲赴成都後主以備敵既定不聽及城

都不守弋素服哭號大臨三日諸將咸勸宜速降弋

曰今道路隔塞未詳主之安危大故去就不可苟也
若主上與魏和見遇以禮則保境而和不晚也若萬
一危辱吾將以死拒之何論遲速耶得後主東遷之
問始率六郡將守上表曰臣聞人生於三事之如一
惟難所在則致其命今臣國敗主附守死無所是以
委質不敢有二晉文王善之又拜南中都督委以本
任後遣將兵救援呂興平交趾日南九真功封列侯
華陽志曰及晉世因仍其任時交趾不附假弋節遙
領交州刺史得以便宜選用長吏令官和解夷人及
適罰之皆依故事進號崇賞焉弋卒子在龔領其兵
晉寧州刺史列傳魏既併蜀司馬昭因庾降都督之

舊以霍弋任之弋卒子在龔暫領其兵和諸姓旋以

巴西太守吳靜為代二字增華靜在官數年撫卹失

和軍師鮮于嬰表徵靜還嬰因代之晉書紀太康元
年秋七月虜軻

成泥寇西平浩豐殺督將以下三百餘人二年十一
月鮮卑寇遼西平州作牀刺史鮮于嬰討破之嬰見
史者武帝泰始七年華陽志八月以益州大分南中

建寧雲南永昌興古四郡為寧州嬰為刺史遂曲赦

四郡殊死以下咸寧五年尚書令衛瓘奏兼併州郡

太康三年罷寧州晉書武帝紀太康三年秋八月罷
平州寧州刺史三年一入奏事

置南夷罷寧州諸郡還益州置南夷校尉持節如西

夷皆舉秀才賢良以天水李毅為校尉持節統兵鎮

維記

南中統五十八部都監行事每夷供貢南夷府人牛
金旃馬動以萬計皆豫作忿恚致校尉官屬其供郡
縣亦然南人以爲饒自四姓子弟仕進必先經都監
夷人大種曰昆小種曰叟皆曲頭木耳環鐵裹結無
大侯王如汶山漢嘉夷也夷中有桀黠能言議風服
種人者謂之耆老使爲主議好譬喻物謂之夷經今
南人言論雖學者亦半引夷經與夷爲姓曰遑耶諸
姓曰自有耶世亂犯法輒依之藏匿或■有爲官所
法夷或爲執仇與夷至厚者謂之百世遑耶恩若骨
肉爲其逋逃之藪故南人輕爲禍變恃此也其俗徵

巫鬼好詛盟投石結草嘗常以盟詛要之諸葛亮乃
爲夷作圖譜先畫天地日月君長城府次畫神龍龍
生夷及牛馬羊後畫部主吏乘馬幡蓋巡行安郵又
畫牽牛負酒齎金寶詣之象以賜夷夷甚重之許致
生口直又與瑞錦鐵券每刺史校尉至齎以呈詣動
亦如之毅後永昌呂祥爲校尉祥後數人數人無考李毅
廣漢郡人字見剛王濬刺益州以爲主簿別駕舉秀
才濬伐吳爲參軍封關內侯遷雲南太守濬薨武帝
思濬勳問毅所在徙犍爲使持節南夷校尉久之建
寧太守巴西杜俊朱提太守梓潼雍約懦無治政

以賄成俊奪大姓鐵官令毛詵中郎李督後賢志督作敵下同

部曲致誅弟耐罪朱提大姓太中大夫李猛有才幹

弟為功曹分當察舉而俊約受都尉雷逢賂舉逢子

炤孝廉不禮猛等怨之大安元年秋詵督猛逐俊

以叛猛遺之書曰昔魯侯失道季氏出之天之愛民

君師所治知足下追踵古人見賢思齊足下箕帚枉

慙吾郡亦逐約應之作亂眾數萬毅討破之斬詵首

督走依違耶五荼夷帥于陵承猛箋降曰生長遐荒

不達禮教徒與李雄和光合勢雖不能營師五丈略

地渭濱冀北斷壤斜東據永安退考靈符晉德長久

誠非狂夫所能干輒表草面歸罪有司毅惡其言遂

誘殺之行部永昌從事江陽孫辨上南中形勢七郡

斗絕晉弱夷強加其土人屈寒應復寧州以相鎮慰

冬十一月丙戌詔書復置寧州增統牂牁州朱提合

七郡為刺史加龍驤將軍進封成都縣侯後賢志作成都內侯

二年于陵承詣毅請恕督罪毅許之督至羣下以為

誅督破亂州土必殺之殺不得已許諾及死督于陵

承及誅猛違耶怒扇動謀反奉建寧太守巴西馬恢

為刺史燒郡偽發毅方疾作力出軍初以救恢及聞

其情乃殺恢夷愈強盛破壞郡縣殺吏民會毅病甚

其情乃殺恢夷愈強盛破壞郡縣殺吏民會毅病甚

其情乃殺恢夷愈強盛破壞郡縣殺吏民會毅病甚

其情乃殺恢夷愈強盛破壞郡縣殺吏民會毅病甚

其情乃殺恢夷愈強盛破壞郡縣殺吏民會毅病甚

其情乃殺恢夷愈強盛破壞郡縣殺吏民會毅病甚

其情乃殺恢夷愈強盛破壞郡縣殺吏民會毅病甚

軍連不利晉民或入交州或入永昌牂柯半亦爲夷所困虜夷因攻圍州城毅但併力固孤城病篤不能戰討時李特李雄作亂益州而所在有事救援莫至毅上疏陳謝不能式遏寇虐疾與事遇使虜遊魂兵穀旣單器械窮盡而求救無望坐待殄斃若不垂矜憂乞請大使及臣尙存加臣重罪若臣已死陳屍爲戮光熙元年春三月毅薨子釗任洛還赴到牂柯路塞停住交州文武以毅女秀明達有父才遂奉領州事秀初適漢嘉太守廣漢王載載將家避地在南故共推之又以載領南夷龍驤將軍秀獎厲戰討食糧

已盡人但茹草食鼠爲命秀伺夷怠緩輒出軍掩破

首尾三年釗乃得達丁喪文武復逼釗領州府事毅

故吏毛孟等詣洛求救至欲自刎懷帝乃下交州使

救助之懷帝紀永嘉元年夏五月建寧郡夷攻陷寧州死者三千餘人以釗爲平寇

將軍領南夷護軍遣御史趙濤贈毅少府謚曰威侯

交州刺史吾彥遣子威遠將軍咨以援之朝廷以廣

漢太守王遜爲南夷校尉寧州刺史代毅遜字紹伯

魏興人也仕郡察孝廉爲吏部令史轉殿中將軍累

遷上洛太守私牛馬在郡生駒犢者秩滿悉以付官

云是郡中所產也轉魏興廣漢太守按史本傳不言遜爲廣漢守據

治中毛孟詣京師求刺史不見省孟固陳曰君亡親喪幽閉窮城萬里訴哀不垂愍救既慚包胥無哭秦之感又愧梁妻無崩城之驗存不若亡乞賜臣死朝廷憐之乃以遜為南夷校尉寧州刺史於郡便之鎮遜與孟俱行道遇寇賊自永嘉元年授除四年乃至本傳云永嘉四年毛孟求刺史遜未到州與孟俱行臨年乃至今從華陽志遜舉建寧董敏為秀才本傳作董郡久無太守功曹周悅行郡事輕敏不下其板本傳云謂聯非遜至怒收殺悅悅弟秦藏長周易合夷叟謀以趙濤父混昔為建寧太守有德惠潛欲殺遜樹濤事覺遜并濤誅

之夷晉莫不懼表釗為朱提太守治南廣禦雄時荒亂後倉無斗粟眾無一旅官民虛竭繩紀弛廢遜惡衣菜食招集夷民夷徼厭亂漸亦返善勞來不怠數年克復以五茶夷昔為亂首圖討之未有致罪會夷發夜郎莊王墓遜因此遂討滅之又誅豪右不奉法度者數十家討剛夷數千落俘馘千計獲馬牛羊數萬餘威震南方建興初遜以地勢形便上分牂柯為平夷郡又分為夜郎郡分朱提為南廣郡分建寧為平樂郡分雲南為河陽郡華陽國志元帝世王遜移朱提治郡南廣又云孟州郡後太守李過與前太守董懂建寧爨量共叛王遜表改孟州為晉寧郡又云晉元帝世太守建寧

雜記

皆施行遜又遣子澄奉表勸進於元帝元帝嘉之累

加散騎常侍平西安南將軍又兼益州刺史假節校

尉刺史如故賜爵褒中縣公南中志云而嚴猛太過

多所誅鋤健為太守朱提雷炤流民陰貢平樂太守

董霸破牂柯平夷南廣北降李雄愍帝紀曰建興四年

太守董懂保興古槃南以叛雄晉書明帝紀曰

太守李釗為李雄所執自蜀逃歸遜復以釗為越

太守李雄遣李驥任回攻釗釗自南秦與漢嘉太守

王載共拒之戰于溫水釗敗績載遂以二郡附雄後

驥等又破越嵩渡瀘水寇寧州遜使將軍姚崇南中

瀘水透水死者千餘人崇以道遠不敢渡水南中志

州十四年州人推中子堅領州府事詔除堅為南夷

大破之 遂以崇不窮追也怒囚群帥執崇鞭之怒

甚髮上衝冠冠為之裂夜中卒南中志曰太興遜在

州十四年州人推中子堅領州府事詔除堅為南夷

州十四年州人推中子堅領州府事詔除堅為南夷

校尉寧州刺史假節謚遜曰壯陶侃懼堅不能抗對蜀人表以零陵太守尹奉為代徵堅還京病卒奉南

陽人成帝咸和初為寧州刺史南夷校尉南中志曰永昌元年

奉為刺史考晉紀明帝太寧元年王遜遣姚岳距李

驥在永昌後數年又變量李暹降雄在二年則其時

遜尚未薨也志當有誤太寧王遜時爨量保盤南遜

出軍攻討不能克遜薨後寇掠州下吏民患之奉重

募徼外夷刺殺量而誘降李邊盤南平以功進安西

將軍遷陵伯乃割興古雲南為西平郡二年正月寧

州起義兵攻李雄將任佗李謙等雄遣其將羅恆費

黑救之奉遣裨將姚岳朱提太守楊術援遣戰於登

臺岳等敗績術死之七年秋李壽寇寧州以費黑為

司馬與邵攀為前軍由南廣入又別遣任回子調由

越雋冬十月壽黑至朱提朱提太守董炳固城奉遣

建寧太守霍彪建寧大姓爨孫等助炳時壽已圍城

欲逆拒之黑曰料城中食少霍彪等雖至齎糧不多

宜令人入城三穀猶嫌其少何緣拒之彪等皆

入城城外壽意攻之黑謂必待其困不足汲

汲壽戰與不利三軍事任黑八年春正月彪炳

等出險三舉州降雄遷奉於蜀奉在州威刑

緩鈍治下理至是南中盡為雄有壽偽領寧州其

初武烈甚肅復轉凌掠民秋建寧民毛衍羅屯等殺
偽太守邵攀又牂柯太守謝恕保境獨為晉壽曲破
之恕終不為壽用恕官至撫夷中郎將寧州刺史冠
軍將軍九年春雄分寧州置交州偽以霍彪為寧州
爨深為交州刺史封壽建寧王咸康二年廣州刺史
鄧嶽遣督護王隨擊夜郎新昌太守陶協擊興古並
尅之四年秋■月丙午分寧州置安州五年春三月
乙丑廣州刺史鄧嶽伐蜀建寧人孟彥執李壽將霍
彪以降七年十二月癸酉罷安州穆帝升平初以毛
穆之督寧州諸軍事揚威將軍寧州刺史穆之子憲

祖榮陽陽武人哀帝興寧初以周仲孫督寧州軍事

振武將軍寧州刺史仲孫訪之孫廬江尋陽人訪子

撫字道和咸和後曾以征虜將軍督寧州諸軍事本

後年未詳當在咸和仲孫在州貪暴人不堪命桓温以

梁益多寇周氏世有威稱復除監益豫梁州之三郡

軍事寧康初楊安寇蜀失守免官太元中為寧州刺

史者有費統水經注云太元十四年寧州刺史費安

帝初毛穆之子璠為寧州刺史晉書毛璠傳云璠弟

寧州刺史璠喪官璠兄球孫祐之及參軍費恬以數

百人送喪葬江陵會桓元之亂義熙元年安帝及正

以璠弟蜀郡太守瑗為輔國將軍寧州刺史未至為
譙縱所害廣韻閩字注云晉有寧州刺史樂安辟闡
彬通志又有辟閩允晉寧州刺史平原人皆未詳何

帝時

並棠陰
文稿

仁懷王氏藏永明王時勅皇帝勅諭榮昌伯王祥自
虜寇不靖重變之交天險蕩然豈誠雲連飛棧凌夷
不足恃哉蓋亦忠義雄武之臣遠引辭難無或投袂
發憤者耳卿生本蜀材志切國恥慷慨任事曉暢兵
機用能奠定巖疆驅除醜虜遵重克復皆卿之功朕
用眷嘉特允督輔臣何騰蛟奏兼採廷議封卿榮昌

世伯以勳代券子孫世世承襲卿其祇承蜀封天險
古稱四塞民氣武健地利饒廣固我中興根本地也
卿其秣馬厲兵席捲全蜀鎮臣楊展以恢復敘功朕
已晉封廣元伯督輔應熊聞在重涪一帶以卿忠奮
秉其方略何堅不摧朕暫蹕桂林旦晚出楚岸望捷
音慰朕西顧欽哉特勅永曆二年正月又皇帝勅諭
榮昌世伯晉封錦江侯王祥烽壘盈郊拊髀思切疆
圉宣力推轂倚隆况今■髮我人民■我土宇求
其宏濟艱難綏靖王室者惟熊罷不二心之臣不策
勳庸曷昭彝典卿王祥忠貞特著勇略冠時砥柱

流撲獻氛之方熾金湯蜀國雄虎豹於當關屢復名城身鏖百戰昔馮異鎮關中而隴右以寧吳漢據成都而春陵遂王揆卿之績何少遜焉今朕躬督六師警恢函夏三楚之士宇旣復兩粵之義旅翕從則卿蜀西半壁朕實根本之丕基卿爲朕之元佐矣茲特封卿爲錦江侯提督蜀秦軍務鎮守川東北等處地方提督漢土官兵鑄頒鐵券給與勅印允盟帶礪用光彝典卿其祇承仍期秣馬滇黔彎弓川楚軍國大事與督撫按臣計議而行副總參遊以下悉聽節制閩外機宜兵將錢糧聽會商徵調地方文武違誤軍

機桀鷲躡治者聽卿參處夫界之事權隆之五等豈云酌卿前功益將期於來效卿益茂厥勛媲美前哲爾公爾侯朕不卿靳朕實賴卿卿毋負於朕志欽哉特勅永曆二年二月又寧聖慈肅皇太后諭忠國夫人熊氏昔宋氏中興韓蘄王世忠宣力疆場功勳特茂其夫人梁氏入覲內廷所以調護隆祐太后者懇懃周至曲盡苦心迄今夫婦並稱垂芳史冊此猶親覲慈顏情孚義浹從未有越在遠藩未邀懿旨而能遙申忠悃者今爾外贊良人力恢全蜀夫忠婦義名譽孔昭遠在天涯不忘進奉此在鬚眉男子尙且難

之而况屬在中朝者乎予嘉爾忱爰特賜爾金髻一
頂金簪二枝金環一副金花二枝以示予眷倚至意
爾其祇承蓋佐良人一匡大業俟至南都予且期面
爾於慈寧宮矣欽哉特諭永曆三年七月又皇后諭
忠國夫人熊氏昔章仔均出鎮建州其夫人練氏調
護軍中卒獲全城之慶柴紹宣力關西夫人李氏另
陳隊伍人稱娘子之軍此皆內佐其夫以共立功勛
流光青史從未有夫樹績於疆場妻復能輸忱宮壺
如爾者自全川淪陷爾夫力戰盡恢聞爾實慫慂左
右予已不嘉乃勛不意爾遠居天末乃能上念宮闈
旣脫簪珥以裕軍復捐貲奩而佐膳真天篤裴忱古
今罕並者也特賜爾金花一對金釵一對金環一對
金鐲一對以旌爾忠爾其祇承尚蓋相爾夫早匡大
業汗青具載無使古人獨擅美於前也敬哉特諭永
曆三年七月又寧聖慈肅皇太后諭忠國夫人熊氏
蠶叢天險之區賴爾夫恢諸已失雄據上游使
不敢狂逞厥功懋矣朝廷以多事之秋報酌未盡乃
爾夫方悉索幣賦以禦戎爾更出其貲囊以爲上方
之供純忠巨績遠過章臯然此猶人臣事君之義如
是也至歷觀史冊從未有人臣之婦能力輸忠盡者

列子與爾相隔甚遙恩意未洽爾來兩進朱提曲盡
丹悃言念爾忠益增嘆羨茲遣司禮監秉筆太監趙
進總監諸軍■恢剿爰特順賜爾紵絲二表裏以示
予嘉獎至意爾尚贊佐爾夫同心合力益懋鴻勳國
有彝章必不有靳欽哉特諭永曆四年正月又皇帝
勅諭忠國勳標總兵官都督同知掛赤將軍印王
璉璫朕纘緒中興再造區夏顧茲秦關天險蜀道蠶
叢端藉勳臣祥統貔虎師武僇力疆場當關禦侮故
能綏定土疆蕩掃羣醜朕甚毘焉爾鎮臣王璉璫勳
臣子也名時將種世篤忠貞勇冠三軍智周萬里殲

逆寇煽虐秦蜀救寧盪蠢爾腥氛聲靈赫濯永壁成
都諸捷威震華夷朕心嘉尚茲特掛爾永赤將軍印
頒以專勅以示鼓勵爾益奮後效佐爾父勳臣大張
捷伐以奏膚功掃川北■氛奠關中要地內清三楚
前靖幽燕綏匡中原朕於爾厚望迄今四方好音洊
至底定匪難爾其勗諸毋替朕命尚有懋酌欽哉特
勅永曆三年十二月又皇帝勅諭總督秦蜀楚豫滇
黔等處地方漢土官兵恢剿軍務兼理糧餉便宜行
事掛行軍大將軍印兼招討事太子太師中軍都督
府大都督左柱國忠國公王祥朕纘服中興載光祀

夏非山嶽降神不生英傑非股肱叶契不集大勳漢
光得鄧禹再造赤符唐肅任子儀重收京邑稽之往
牒業著君臣肆予丕正際艱危天祚我明式生忠
勇卿勳臣王祥沈毅有勇堅明能斷陳師鞠旅戡虜
恢疆力復西川折衝萬里朕心孚鑒嘉乃豐功特命
廷臣僉議晉爵忠國公專頒勅印以大酌庸惟卿服
此寵光益宏丕績邇來勢已衰我武惟揚朕已告
廟親征卿其肅清湖北直搗荆襄獻俘斬馘會朕金
陵又當策卿大勳盟於王府分茅錫券永誓河山心
尺麟雲朕言不再欽哉特勅永歷四年正月又皇帝
勅諭總督秦蜀楚豫滇黔等處地方漢土官兵恢剿
軍務兼理糧餉便宜行事掛行軍大將軍印兼招討
事太子太師中軍都督府大都督左柱國忠國公王
祥楚豫氛未湔亟恃雄師電掃下咨卿勳臣祥精
忠天挺大義性成懋績夙著西陲威名久震夷夏剿
寇蕩虜躬擐矢石決戰抗守計悉萬全朕心嘉尚頃
晉卿忠國公爵以展酌庸茲提督勁旅出濟荆襄廓
清腥穢特頒勅印加卿行軍大將軍兼招討之職用
重事權以便節制諸鎮聯合各路軍馬共濟同仇齊
張撻伐卿其益壯忠猷鼓勵將士奮勇恢剿式奏膚

功朕已告廟親征指日親率六師資卿後勁卿務先靖江漢繼定洛陽舊都以規一統朕握手敘功直在旦暮麟閣殊榮佇膺寵錫卿勉旃哉特勅永曆四年正月又皇帝手勅忠國勳臣祥卿功在西陲勳昭宗社朕之藉卿厥惟舊矣茲人心雖已共奮而焯尚未告銷惟卿速統銳師或直達雍豫或順下荆揚卿之威名遠鎮夷夏朕知卿必能早底廓清也一應進剿大衛機宜與總監臣趙進從長擘畫舉行務出萬全朕已懸望卿於金陵策勳飲至矣朕言不再卿其體之欽哉特諭永曆四年二月

按王忠國於遵義最著勳名我

高宗純皇帝憫其於天命人心已去之時尚乃心故主強輯

殘疆齋志以沒

賜謚節愍以為效忠者勸

堯仁如天浩蕩難名矣今特探載永明王時所給諸勅令談

忠國事者有所考云又按郡城北五里純陽閣有記云永曆四年庚寅孟夏忠國公掛行軍招討大將軍印太子太師左柱國王祥夫人熊氏及男榮昌世伯王瑋瓊錦衣衛王瑋珽敘南衛百戶王瑋瑤永赤將軍王瑋璞敘南衛指揮王瑋瑞並建是

冥日月不若諸夏之亡是可感也其詳具渠等揭中但渠等心血雖壯而慮始徹終不無尙希所倚倘得六軍西出則諸人卽爭先效死無辭侄戮民也敢復關談所事第念諸人忠藎勃發必欲得侄之一言私于老年伯前侄又安能遜謝乎粵黔接壤逼滋他族可弗圖與萬祈老年伯畱意垂照不負繭踵犯難之行則至幸也侄辱受老年伯知遇之深未識有日赴堦前謝謁否臨啟曷任涕咽惓切之至

又與朱教官書別來倏忽三秋不孝潛處數閱月不啻五百轉劫終老白山自分何之不圖腥羶一洗之

致有今日也中間聞永安殿下闢路前去心甚羨之繼聞受陷不孝廢食長號者數日形諸聲詩情不容已至昨日始知安車過大插慶幸不可言又聞足下近在咫尺私衷甚願一晤患難不死之身視身世一切都如幻泡惟知交一節倍加殷勤珍重耳

又與古零官父書百折餘生晦藏丘壑受恩深處如老盟丈且不能通一音候向子平云當如已死此隱人正法不得不然世事反覆不圖復見今日老盟臺與王端老輩苦心苦術運用深微忠義種子惟不孝能知之此身不致霄墜他日得歸見天子尙可以泣

血相明每念大德難報中夜憮然不孝三僕病奪其二困頓窮愁數月來景况不堪更僕正不必言以重故人慨耳弟勅印之失曩託老盟臺察取風波忽逼遂不敢復問今特申前懇倘得合浦重還俾弟得視爲蘇武一節不致歸死司敗是弟徼兩生之德于台臺者豈尋常哉

又掌臺記湘境有掌臺里中人日爲所弄袖而不肯出卽予曾數年于茲亦識倔强乙卯予復來徵之以句曰四日辛壬癸三生乙卯寅先以武丁申以巨靈一夕劃然雷震腊月轟轟而五輪八寶旋爲舒展異哉不墜不垂身臂相使乃布髮于其井文之中適可而止環山如滁壑林浮末臺位軒輕之牧笛橫來竹肉犁狀屬臺歌三章曰臺以東仰泉出玉龍柳生肘指尖一點通臺之南戴勝擁花冠赤帝劍深深六月寒臺之北萬丈螺陵色石遭鞭屏氣如不息予頷之有泉曰靈珠仰噴田之腹爲九曲以匯于合口有崖曰燕子不知其所始燕子來宮殿值新開其時哉臺晦而倏彰亦可曰靈臺顧不取取肖諸形亦卽以名昔予有聯云云若預爲是設故仍之施主劉氏諱某某妻某氏聞給孤之風一旦上其土田林樹

以爲梵刹詣予甫請予遽曰五木之祥其兆昌昌地
出一手人荷一肩契理契機日昌月盛平水眼目海
眾雲會請法者其示諸斯乎

按啟相於明亡後落髮以前事跡不詳就平水集
錄出三書令略見梗概

遵義府志卷四十七

遵義府志卷四十八

舊志敘錄

溯明以前言遵義一郡者無專書宋鄭漁仲通志藝
文略有梓州路圖經六十九卷夔州路圖經五十二
卷宋史藝文志有南平軍圖經一卷郡于宋在夔梓
南平屬中爲編載所必及論地圖于茲爲古然著錄
時僅存書目撰人時代俱不及知則其亡久矣考顧
氏方輿紀要遵義府下有引舊志數條如言夷牢水
帶水皆非孫志所有其止稱志者孫皆有之例以孫
志通不稽古可見所引別有一遵義舊志然則不得

謂楊氏未滅之前郡中概無著述也惜亦亡矣至孫志形勝中標有正安志桐梓志綏陽志仁懷志以綏陽知縣詹淑著有輿圖志推之知各縣令創始之時俱有紀載是卽孫志所引者其書非成在平播之前由平播後改土畫疆犁然漢法專紀郡事者論之當以廬守曾志爲首然其稿舊不悉新不載世亦無傳則孫太守府志其最舊也後來陳志雖曰增纂究其詳而核簡而備不及孫志遠甚然自孫志後七十餘年得陳志不無可考較之陳志到今一百六十年其間絕無寸冊記錄者其爲善又何如也故並錄其序文詳其存本爲一卷使纂修之年月姓氏不以久而不見其各州縣志亦隸入焉要以諭後之治聞殫見者無土苴淵源云爾

孫敏政纂遵義軍民府志序

嘗考蜀省通志郡在前代條郡縣條土司更置不一然率介在夷漢間及一變設流則夷浸于漢矣迄今十載日更月化則又純然漢矣前代之志或有或無皆不可考惟是今日之郡教化禮樂衣冠文物比于內郡惡得無志且郡雖一隅乎邊土乎而山川形勝物產田賦與人物科目無不備具亦有足述者又烏

可不一志之夫志識也識俗尚可以備觀采識賦役
可以考登耗識媿惡可以存勸戒識靈毓可以興人
文識邊防可以修戒備識方物生產可以辨土壤凡
郡所有何一不當識之志也况吏茲土者巡方問俗
搏捩摩厲自有其事倘如矇瞽登途貿然莫之何以
均調其適損益其宜以善于方俗而和于眾庶故志
不可一日無也制府王公當善後始事命涪陵廬守
曾劄一志彼當草昧經營之初足跡未遍聞見未廣
舊者未能悉新者未及載也及余先後此地七載于
茲每留意斯典因博訪故老耆舊搜采省志輿圖雖
不知其詳頗得其概顧余鞅掌簿書弗暇專力因聘
渝庠紓生德裕董斯事蓋此生博雅富麗善古文辭
嘗與其里鄒給諫公纂修渝志余司戎渝郡時甚器
重之又渝播比壤二郡典故嘗相關涉此生修渝志
時卽兼識播事甚悉庚戌冬曾以播志付之已卽經
理及辛亥至播余復訂之曰夫修志難矣而劄修于
文獻不足之時尤難倘考核不真則失之誣紀載不
悉則失之遺又或不采之輿見公論而妄以私意牽
合附會則失之誕皆非志之善物也子其鄭重之生
唯唯于是閉閣謝事殫精竭力余亦時至取閱莫不

賞心或間出觀聞稍爲更定經歷年餘而此志告成
殺青旣竟予得而卒業焉則見其事核其義精其鋪
敘井然有條其議論卓然有識其體裁一準之渝志
而弗參以已見其事蹟博采之省志郡邑志而弗偏
有所執視廬所纂益加詳焉可謂不誣不遺不誕志
稱成矣彰往詔來于是乎在信今傳後于是乎存不
出戶而一郡掌故可觀于目前不下堂而隨時安攘
可畫于掌上斯可謂一方之實錄也已
在昔常道將志華陽張唐英編蜀檣杙與夫唐宋而下代各有編
至今炳耀三川明徵百代然彼爲太牢庶饒而此亦
山芹野藪雖味不相如而禮神者率並用不廢遵義
載在全蜀此志亦竊備考據後之君子得無芹藪此
志也哉志爲卷二十有二爲目五十有四其創修之
概如此若弁諸首簡以爲此志重尙有俟于鴻裁鉅
筆者萬曆四十年三月知遵義府事楚下雉孫敏政
撰

又李芳序

遵義府志太守孫公所創修者遵義古播州地歷考
唐宋以來迄于今類多古司居之邇來改土爲流經
制未定孫公自丁未歲來守是邦蒞政五年拮据萬

狀勸學興禮息盜安民務舉廢修化行俗美卽古稱
良牧號善國不多讓焉猶思治成易敗法久漸弛非
志無以永其傳也慨然以志爲己任禮延作者以意
授之今初夏方卒業揭諸例要問言于余余曰作志
難作遵義府志尤難何也志他郡者有儒紳父老以
備顧問有故家遺俗以備采擇有斷簡殘篇以備參
考修而成之斯稱實錄今遵義新疆諸凡草創所以
爲難也余觀斯志自圖考以及藝文凡貳十二卷上
之天文下之地理中之人事巨細顯微罔不具載則
公之究心于地方者非一朝一夕之故矣後之任斯
士者辨分野以察祲祥覩形勝以嚴保障若何而養
育人材若何而轉移風俗以至金木水火土穀咸修
正德利用厚生咸理皆爲政之上務一開卷如視諸
掌其利賴于斯志者豈淺鮮哉公今雖遷其官去遺
澤不與之俱往也余奉天子命整飭新疆藉以宴然
無事誠爲厚幸返復詳觀四至疆界則竊抱杞人之
憂焉遵義東連婺川南接湄潭西隣水西均屬黔省
統轄而土夷苗夷伺隙竊發稽諸案牘尙多未結猶
云異類無足深怪且有縣邑不約束其民取比隣而
魚肉之越三度關界一切山澤竹木之利攘爲己有

本機會查按劍相視卽此一端餘大都類是調停甚難然尙隔省耳上下異心是非易淆猶可言也遵義以北壤接瀘綦諸處彼之民流寓于新疆者殆強半焉捏籍網詞騷動上著比比皆然甚至踰境設關張旗苛稅斷荒陬之咽喉視隣封爲秦越在本省且不免焉東西南北四面受敵區區新疆曷能堪此將來不知作何狀作史者于疆界處旣大書之又分書之其意可繹思矣人有爲遵義慮者曰叛逆雖平反側尙多大將軍移駐建南夜郎不無單弱楊■吳洪足爲殷鑒則遵義非無事之國也余亦深以爲然詎知此外尙有隱憂所伏不于其躬于其隣者乎語云蔡人吾人何彼何此是在司土盡捐成心同偕大道以無負孫公作志之意焉斯可矣孫公諱敏政字以道號澹巖湖廣興國州人萬曆壬子仲夏四川左布政使官遵義道事渤海李芳謹序

又魏說序

志猶史也古之文人馳毫驟墨鳥奕詞壇獨于志遼巡不敢置喙而况乎創始尤難之難者乎史漢之前有左國晉唐之前有史漢非然者野錄家乘巷記里載亦未嘗乏于時譬之操贊而遊五都卽不必盡奇

珍異采固業已惟我掇拾矣乃遵義新疆千百年雲霧纒開于一旦龍巖貫珠之間有跡可紀乎懷白威遠之外有古足吊乎端燦二人之外有名實足灑然者乎而郡守孫君以道其靡廢弗舉靡墜弗興之餘白日垂簾清風在聽乃一無所憑托而爲此百年不刊之事是古文人之所逡巡不敢當者以道一日饒爲之氣可知也舊史無聞野錄無載而井然眉宇之列燦然日星之觀才與識可知也志成以示不佞不佞拜手曰傳往開來其在茲乎疊疊者其未有已乎遂書數言于首志始事也萬曆四十年四月四川提

督學政右參議楚人魏說書

又舒德裕序

志以紀事郡國有紀卽古列史遺也遵義之區亦古侯王國哉然昔夷矣嘗羈縻于漢漢矣未脫迷于夷卽陳母諸賢重以漢官威儀臨之亦安所創志志始今日漢亦始今日旣漢必不容不志惟志乃以成漢也郡之削夷名漢自萬曆庚子始年近紀矣上焉未釀移風易俗之化閭閻未融迷惑染惡之習倘亦天時人事氣運化有待而然乎丁未冬下雒孫太宗師承上命守是邦取周官型典次第布之

和中華別之■手持其柄以是悍者友順良
■葉德近悅遠來人紀備矣一切養賢治民安綏神
祇無不令其有依歸無恫怨之綱之紀百度維新因
命纂修志略以俟異日就正于館閣鴻手裕伏而嘆
曰志豈易言哉毋論代斲懼傷難語著作之林卽董
政置志非實有之烏能繪之說乎矧郡新也徒侈其
辭則誕未撫其實則荒荒耶誕耶猶僭以亂其何敢
爰自庚戌冬拜命來檢搜故實暨辛亥冬季直走牂
柯得覽高山大澤之奇爽氣生腋入郡則監司師帥
諸百執事星列碁布而閭里熙皞所謂蔡人始樂更
生又何幸化國也於是紀其源條其派因其俗錄其
事跡其形勝山川故典而鱗次焉緩急先後象天宜
人釐爲卷二十有二列目五十有四靡以傳奇聊志
實也蓋自壬子春三月始竣事焉嗚呼夏商之禮資
于文獻春秋之例動舉必書斯志也所以備文獻謹
動舉者也固尤存乎人耳語曰有治人無治法後之
君子按籍而理周覽山川疆域之盛則思申畫撫固
之宜博綜田賦民物之■則審經綸區處之策參酌
沿革損益之制則操順治威嚴之防觀風問俗弔古
懷賢不啻尚書之謂舊典時式休前寧人斯無負創

通志卷四十六
志哉不然者漢惟今日嘉陵太史言之也

黃立言再刻遵義府志序

立言于紀事之書少讀唐應德先生左編喜其刪次有法已見李宏甫藏書特從是中抽出其位置將相稍換字面耳非有加于應德也及登仕版丹鉛頓廢初理嚴多副車之役再入蜀半在兵間然所至何敢後圖籍今郡縣志卽他日史料也獨苦此道無名手率多蕪穢况梓柯前此荒服後此兵燹畱什一于千百尤希闕事檢舊志差不甚遠于雅馴山川之阨塞田賦之登耗戎兵之克詰文德之救寧于是乎在雖規締不同亦前事之無忘也爲再刻郡齋以存其大都茲滄桑又一改矣乘障宣力多有可書者非道將未免見請願徐侯之崇禎辛未秋八月知遵義府事豫章黃立言題

按此志知府孫敏政聘重慶諸生舒德裕所撰創始萬曆三十九年辛亥成于次年壬子書凡二十二卷五十四目時上距平播僅十二年新疆設施規制賴以考見據黃公重刻序知必有初刻矣明後兵燹兩刻蕩然今民間僅存有前十卷寫本且多所訛脫巢經巢藏首四卷本用厚紙寫前三卷

聯縫鈐遵義軍民府印間頁鈐遵義軍民府糧捕廳印第四卷不完校之十卷本少訛脫此為最舊官本無疑據陳心齋隨筆言所見僅二十二卷中之不滿三卷者心齋與趙蘆洲太守商纂郡志在嘉慶乙亥丙子間見孫公志即在此時若所見全書僅不滿三卷則存者尚有十九卷到今止二十餘年何以十卷本外皆絕無踪跡可見心齋所見即是今巢經巢本其本卷皆接寫卷之四者僅存兩葉心齋誤以為第三卷未完不知實是二十二卷中之不滿四卷者不然或係隨筆稿誤四字為

三字也據陳志序稱此書遺籍無存即獲斷簡半屬零落是康熙初年已無全本猶幸十卷僅存郡中大政令如賦役差徭等尚能首尾備晰可寶也

陳瑄修遵義軍民府志序

今上右文重道經史編輯厥有成書復

詔天下廣修志乘以昭一統之烈維西蜀界在天末藩憲劉

公仰體

睿思下纂修之令于各郡毅然以興起廢墜為已任其為世道人心計至深且遠府憲李公奉傳檄委屬徧告州縣且諭之曰守土之官知賦役而後可養民知學校

而後可造士知祀典而後可事神知風俗而後可順人情知山川而後可藝物產推廣厥端各有所本學問經濟胥于修志乎見之會公以

覲典赴省瑄承乏遵義附郡城爲諸邑首庸敢忘厥事顧纂輯他郡之志易纂輯遵郡之志難何也曰以割以散以變故播世爲西南夷唐宋來楊氏踞其地明萬曆始入版圖星野形勝諸大端彼固莫知所紀典禮文物之風蔑如也旣隸職方宜登簡策是謂割或曰平郡後有孫公敏政爲郡覽山川人物土產風俗之宜彙成一編宜可觀乃羽檄烽烟間或未息問其遺

籍無復存者卽獲斷簡于灰燼之餘半屬零落省志所載落落晨星而已是謂散且播自建治于今將百年其間政事之沿革官舍之更置與夫賦役多寡選舉升降之數前後弗侔僅裒集散帙以爲規模具是毋乃或戾于時是謂變夫爲割爲散爲變皆足窮我以所難今欲創者使之全散者使之聚變者使之經畫于有常豈不視乎文獻哉瑄遂與參軍鄧公希侃廣文陶公淑李襄集本郡名儒程君崇劉君沛曾君光祖唐君廉羅君士柏楊君希震萬君人英王君夢麟牟君從周陳君我聖周君之閱研精殫思焚膏繼

纂于其創則區以名類統以條貫補昔之所亡詳今
之所有將不病其弗全也于其散則羅榛莽訂魯魚
比物而得其情連類以成其美將不病其弗聚也于
其變則究其源流參以事勢尋墜緒益新猷令如指
掌如列眉將不病其弗常也再閱月而書成爰上之
府憲李公從而斟酌之再上之藩憲劉公從而鑒定
之然後責梓人裝潢成集拜獻于
朝廷夫蜀爲天下偏隅播于全蜀又爲末郡乃其書亦
得附各省以上達播志旣備則

盛代一統之烈益彰他日者

天子坐明堂覽圖籍命太史采風而觀之雖夜郎去

京師萬里不啻登之几席之上知養民也益減其賦役
造士也益崇其學校事神也益豐其祀典順人情也
益厚其風俗孳物產也益辨其山川懷柔休息德洋
而恩溥將見風雨調四時和黎庶嬉遊百昌咸若愈
信今日藩憲劉公重慮夫世道人心府憲李公汲汲
于學問經濟其造福于西南半壁非淺鮮也瑄也屬
在下吏且樂得宣德意而賡太平之盛治矣康熙乙
丑遵義縣知縣陳瑄撰

按此志遵義知縣陳瑄集府中孝廉程崇等十一

人成之者書凡三十二卷三十二目體例倣孫志之舊而稍變之仍卽舊文銓配各類孫志後事略有增緝中間亦時出已論然再閱月卽成書雖與事者十數人其爲草草塞責可知矣故自萬曆壬子至康熙乙丑七十餘年中以遵義界黔蜀之要兵戈盜賊紛紛擾擾爲事不知凡幾其間忠臣義婦深林隱遁之士又不知凡幾而俱不道及如王忠烈死土酋之難事亦轟烈矣今日非得舊藏殉難錄其首尾直不能言他事之不能言者不能不爲此書憾矣在當日

國初以來事皆纂修諸子身經目睹其稍遠者父老必多能道之若條次明白亦誠易易而顧若是簡略非志在速成之病哉此志故無刻本今搜得民間所藏寫本四冊其第三冊裝紙存上鈐仁懷縣儒學記一印知是初成書時寫存官本也陳心齋家藏一本乃是節鈔似卽從此本錄去故其誤字亦同

各州縣舊志

趙宜霖纂正安州志序

國朝有一統全志藉以考山川辨疆域稽人才核兵食

通志序二 卷四十一
察風俗一字一句動關國計民生非苟焉而已下此
則各省各郡邑皆有志省志從簡郡邑志從詳應簡
而詳有紕繆之患應詳而簡有掛漏之虞此體制之
分也余于嘉慶丙寅揀發來黔已巳秋題牧正安茲
地雖介邊陲自我

朝定鼎以來百七十年民安耕鑿士樂詩書亦旣彬彬
質有其文矣惟邑中志乘歷來未有執簡成書者豈
其每懷靡及耶余忝司民牧凡職守所在有可以自
靖其心者不敢以邊徼外視每念職方之典缺而不
修將貽後賢之誚惄然憂之嗣因委辦滇銅役役風

塵有志未逮偶于且蘭鄭竹香太守署中邂逅錢塘
陶子兩峯交成傾蓋延至珍州思商確前志適值吾
宗蘆洲郡伯重來守播公餘之暇纂修府志採訪所
及不遺遐荒誠盛舉也余旋任未幾又將量移安隆
因亟與兩峯撫拾前州牧袁君舊記與州從事朱君
雅堂以及游君靜軒張君恕堂曹君玉采釐而增之
爲是州補歷來未有缺典舉凡星野方輿兵防賦役
名宦鄉賢咸從省志及州卷搜羅採輯甫得成書但
余不敏未深學殖雖旁求博訪而疑似半參不敢自
信質之沈觀察葢山夫子參互考訂乃使夜郎舊壤

文獻可徵庶幾對揚

聖天子休明之治方擬付刊剛蒙憲卓異入都引

見旋遷平越直牧以致未果閱載餘公暇爰編之成卷是為

序嘉慶二十三年戊寅孟夏南豐趙宜霖撰

按此志凡四卷知州趙宜霖屬杭州諸生陶有容所為者以前知州袁治舊記為本摘錄通志採摭卷及目前事實增成之有刻本

邱仲胆修桐梓縣志序

桐舊隸蜀蜀名區也今

上御極之五年丁未余奉

命候用於茲嘗俯仰憑眺其間於山見峩眉之高于水見錦

江之秀于賦睹司馬凌雲之奇于文羨長公家學之

富仰止殷矣是歲冬川憲委署桐邑風土人物卓有

可稱與茂陵眉山爭勝爰索邑志披閱僅得前令賈

公續郡守孫公之舊而載其略大概地多雄峯峻嶺

為夜郎王舊域人文固可見矣且志無刊本祇手錄

一冊而傳寫失真不無魯魚亥豕之謬余不揣愚陋

爰據改訂尙未之竟乃殫于勸首查丈之責披荆棘

冒霜露日奔馳于窮鄉僻壤中清其界而均其畝已

酉春遵郡歸黔復奉憲命再俟清釐矢公矢慎俾民

不爭是役也既越阡而度陌亦覽勝而採風東上魁巖則望賜谷之日出南躋樓關則信馬首之雲生西過夜郎弔青蓮之遺跡尚有存焉者乎北渡濛橋訪吳霸唐蒙之勳烈至今未泯徘徊者久之竊意登高作賦學士之才也化民訓俗有司之任也每與父老子弟相慰誨曰惟茲土田雖瘠而山水秀甚

興朝以來沐浴

聖化士爭濯磨人恥不學如某之標節孝某之拔科名其所由來也遠矣尙其敦德行而修文藝以益增斯世之光眾曰唯唯歲辛亥恭逢

上命纂修縣志大憲分命郡縣詳訂邑乘以供採擇余自愧寡聞鮮見不足以參著述之末爰將夙所訂證備錄以呈復廣搜博稽增補成編以俟班馬良史修飾潤色焉已耳雍正九年辛亥八月知桐梓縣事高陽邱仲胆謹撰

按此志知縣邱仲胆所纂今搜得寫本一冊無卷數據自序乃改訂賈國樞舊志爲之者賈志巢經巢藏寫本一冊分上下兩卷無序惟開卷首行桐梓縣志下小注上卷止于雍正七年下卷止于康熙二十四年第二行題曲沃賈國樞評第三行題

康熙甲子舉人任靈山縣李晉選考國樞以康熙二十年辛酉來任桐梓李晉補志說云余甫登賢書卽膺修志悔多簡略是賈志之成在康熙二十三四年間經巢本下卷是其元本上卷續入雍正七年以前事者未知出自何人也

陳世盛修綏陽縣志序

天下之廣東西南朔風土不齊古太史採風以獻王廷誠巨典也今

聖

天子當陽聲教四訖德威廣播遐陬異域莫不梯山航海望風景從卽時省方問俗亦難遍歷周知此一統志

之修所不容已也稽古職方所載九州大勢略備開覽而十五國風採民間之歌謠占人心之邪正見政治之得失正變貞淫懲勸法戒臚列方冊瞭如指掌又卽州縣志之所起義也綏邑爲禹貢梁州之域天文井鬼分野永山仙嶺周環保障雅水清泉旋繞堤封南連遵湄羊腸萬疊北界桐正鳥道千迴况文才武略不無著績之人花香草瑞胥爲載筆之物一經搜集千載流芳志不可以修乎且志之所載取其扼要方輿不志星野疆域山水形勢莫知界限建置不志城郭廟壇縣治學宮莫詳創作典祀不志犧牲不

陳業盛不備無以御旱溢之災官職不志善政不存治道易沒無以觸甘棠之思推而食貨有志選舉有志人物藝文有志班班可考詎不要哉溯前明詹公淑當設縣之始撰有輿圖志惜遭兵燹遺集散失迨甲寅前令唐椿僅得鄭松齡殘稿欲修而未全某自乾隆二十三年十月到黔卽蒙委署綏篆旋奉各憲檄飭查議志書不修文獻無徵故到任之日卽覓縣志書吏茫然無以應旋集通邑紳士採輯前令殘稿設立公局囑以各盡所長共勦厥事務期詳搜博採稽實核真刪繁補缺彙輯成帙使事事有切政治有益風化庶可與職方風詩省志郡乘並垂奕禩云乾隆二十四年己卯攝綏陽縣事澄海陳世盛謹識

按此志凡八卷知縣陳世盛屬邑貢生傅維澍諸生田見龍所纂以鄭松齡舊稿爲本採目見增益成書時通志已行毫不摘載知所據僅一松齡舊稿而已

仁懷縣志稿

今得志稿六冊無卷數每目發端喜作迂腐之論顛預冗長多無歸宿紀載悉汎摘通志于邑之當徵者十未能道其一亦無撰人姓名惟考論數篇

各題下有禹坡二字蓋當嘉慶乙亥丙子間趙蘆洲太守有纂緝之志令仁懷者先次此稿思附之禹坡或卽其人或是其客耳

遵義府志卷四十八

